

Perdana Menteri tegur golongan pertikai usaha tingkatkan Islam

BM - 5 AUG 1985

KEPALA BATAS, Sabtu — Perdana Menteri, Datuk Seri Dr Mahathir Mohamad, menyifatkan golongan yang mengeluarkan tafsiran-tafsiran yang salah, terutama mengenai usaha-usaha kerajaan meningkatkan syiar Islam, sebagai golongan yang terpengaruh dengan dunia Barat.

"Ada setengah sekolah dan guru-gurunya menyalahgunakan kemudahan pelajaran dan mengkhianati usaha kerajaan memberikan pelajaran agama kepada pelajar Islam dengan membuat tafsiran yang salah.

"Saya harap kejadian ini tidak akan berlaku lagi di sekolah yang guru-gurunya sanggup menerima gaji daripada kerajaan, tetapi menjadi pengkhianat," katanya ketika merasmikan Sekolah Menengah Kebangsaan Al Irishad, Pokok Sena, dekat sini petang ini.

Oleh itu, beliau menasihatkan guru dan ibu bapa menentukan anak-anak mereka tidak terbabit dengan golongan yang hendak mengkhianati usaha baik kerajaan itu.

"Usaha kerajaan meningkatkan pengajaran Islam di sekolah-sekolah adalah dikehendaki oleh Islam. Usaha itu juga tidak akan memisahkan pelajar Islam dengan bukan Islam," katanya.

Sementara itu, Menteri pelajaran, Datuk Abdullah Haji Ahmad Badawi, berkata Kementerian akan menambahkan peluang melanjutkan pelajaran kepada pelajar-pelajar, terutama dalam bidang pengajian Islam.

"Dengan itu, pelajar-pelajar Islam yang mengikuti pengajian itu dapat menggunakannya untuk kebaikan bangsa, agama dan negara.

"Sejak Dasar Pelajaran Islam dilaksanakan, lebih dua juta pelajar Islam mendapat didikan agama. Pelajar bukan Islam juga pula diberikan peluang sama rata kerana kerajaan tidak bersikap pilih kasih," tambahnya. Sementara itu, ketika be-

rucap di majlis jamuan teh rakyat di Padang Majlis Bandar Seberang Prai, petang ini, Datuk Seri Dr Mahathir berkata, ada orang yang cuba menggunakan undang-undang untuk menimbulkan isu perkauman.

Katanya, mereka yang mempunyai kepentingan politik cuba menjadi juara kaum dengan membela pesalah-pesalah yang dihukum oleh undang-undang dan menimbulkan isu perkauman agar pesalah itu dibebaskan.

"Saya tahu isu itu sengaja dibangkitkan untuk menarik perhatian umum di sebabkan ada kepentingan politik," kata Perdana Menteri.